

# Carta nú uquie'e Santiago

**1** Li'á Santiago, enu sibi' lu Diose cuna lu Jesucristo enu rnibiya', xe'laa saludo lu yehua enu nze'ta lu familia' bee bene Israel li'ihua enu uri'chia letse diqui lu iliulabe.

## Elliebacu' nú nze'ta lu Diose

<sup>2</sup>Bee sa'a enu nzeli arquia'ahua Jesucristo, nialuhua nú ñia utsu arqui'hua añinzuka nú nu' huaxi nú secahua. <sup>3</sup>Xne li'ihua nediyahua chenu secahua xitse beenú secahua equie nú nzeli arqui'hua Jesucristo, scua acahua tsuta' arqui'hua nu riqui'hua lu beenú secahua. <sup>4</sup>Pero ubi'yahua lunú utsuta' arqui'hua scua, nu zibi' nucua' para nú ri'ihua tucu nú rialane, che scua neza' lunú neca elliebacu'hua para nú lecaxi ri'i falta elliebacu'hua.

<sup>5</sup>Tunu nu' tátucuhua enu rri'i falta elliebacu', nacu' nze'ene lu Diose, xne siempre rdete' Diose elliebacu' lu ye bee bene nu la cánue. <sup>6</sup>Pero rqui'ña nú nacu'llae lu Diose diquinu' arqui'lla nu la za' arqui'lla, xne bene enu sa' arqui' li'illa necalla xi neca inzatu' nú rri'i bii nú nza nze'ta. <sup>7</sup>Nu bene enu neca scua, la ri'illa elliebacu' nú yuculla lunú unacu'lla lu Diose. <sup>8</sup>Xne bene enu sa' arqui' scua, la

ri'illa tucutsia elliebacu' nu la challa tucutsia inziu.

<sup>9</sup>Bee sa'a enu nzeli arquia'ahua Jesucristo, li'ihua enu neca bee bene elitsi, ñia utsu arqui'hua equie nú nediyahua nú huaxi secahua lu Diose. <sup>10</sup>Pero li'ihua enu neca bee bene xene, ñia utsu arqui'hua nu aca lle'na arqui'hua lu Diose. Xne bee eluxene la di'yaee tucu nú la di'ya bee quiee. <sup>11</sup>Li'ihua nediyahua nú chenu rliñi bichia nu chiqui' nelee siqui' be' bichia huañi dafí, che sana' bee quie lue, scua unitilu nú ñia rnae. Le'ca esquie bene xene atilla añinzuka nú necalla xene, nu che scua ulaxu nú neca eluxene'lla.

## Chenu rriqui' bee bene prueba nú seca beella

<sup>12</sup>Ñia nza lu cuenda' bene enu nzuta' arqui' nu rriqui'lla lunú nehuana secalla equie nú nzeli arqui'lla Jesucristo. Xne equie nú uriqui'lla scua yuculla premio nú rialalla, nu premio cua' neca elunehuañi nú leca xunga laxu tucu nú ucuaqui u'na Diose nú dete'nu lubee bene enu seca li'inu. <sup>13</sup>Chenu rri'i taa tucuhua elliebacu' nú ri'illa nú necha neca, la ri'illa elliebacu'

nú Diose rdete' elliebacu' cua' lulla, xne Diose leca bichia nú rri'inu nú necha neca, nú le'ca la dete'nú elliebacu' lubee bene para nú ri'i bee bene nú necha neca. <sup>14</sup>Xne le'ca li'i elliebacu' nú necha neca rri'i bee bene, ze'e nze'ta nú riu'u ana arqui' bee bene nú rri'i bee bene lunú necha neca. <sup>15</sup>Nu equie bee elliebacu' nú necha neca cua' rri'i bee bene dula, nu chenu rnibiylla dula cua' lubee bene, nzuquietsialla castiya'lla.

<sup>16</sup>Enze'e la zequienhua le'catsia li'ihua bee sa'a enu nzeli arquia'ahua Jesucristo, enu chiqui' se'ca. <sup>17</sup>Xne ye elliebacu' nze'ca nu ye beenú neca nze'ca nze'ta lu Diose, li'inu enu ureche'e ye nú nu' liñibe. Diose leca bichia nú che'enu lunú necanu, ye bichia rri'inu tucu nú rialane. <sup>18</sup>Nu equie nú scua niarqui' Diose, uliqui'lanu lua'ahua elunehuañi nú leca xunga laxu lunu, xne nzelila arquia'ahua bedichia' nze'ca'nu, scua neca'ahua xi neca ebichi rlu lu beelá bee bene enu chili arqui' li'inu.

**Tunu neli rri'i bee bene  
lunú niarqui' Diose**

<sup>19</sup>Nee lunú nediya'ahua bee nucua', bee sa'a enu nzeli arquia'ahua Jesucristo enu chiqui' se'caa, utsu tsiñahua para nú yene'huá chenu rni bee bene, nu la liala'huá nú chu nihua cuna nú chu leehua. <sup>20</sup>Xne bene enu rlee leca modo ri'illa lunú riu' arqui' Diose. <sup>21</sup>Enze'e utsana' arqui'huá ye beenú lecaxi zibi', cuna ye beenú necha neca nu' lu iliulabe quie!, nu uri'i lle'nahua arqui'huá uquia quiehua

Stichia! Diose nú ubenela'hua, xne equie cuenda'tsia bedichia' cua' nu' modo nú tsila'ahua.

<sup>22</sup>Pero la yene' tsiahua Stichia! Diose uri'ihua tucu nú rnii, xne tunu la ri'ihua scua sequienhua le'catsia li'ihua. <sup>23</sup>Xne bee bene enu riene'tsia Stichia! Diose nu la zucu'lla tucu nú rnii, li'illa necalla xi neca tucu bene enu ri'ya lu huana nú xa rnaalla. <sup>24</sup>Nu chenu nzalla uzañi'lla xa rnaalla. <sup>25</sup>Pero bene enu la zañi' lunú ubene'la'lla, máselá rcua'nalla nú ri'illa lunú rni Stichia! Diose nu lecaxi ri'i falta, xne bedichia' cua' neca nú sila'a lia'ahua lu dula. Benecua' nzuta' arqui'lla rri'illa lunú rnibiy'a Diose, nu ñia tsu arqui'lla ri'illa bee nucua'.

<sup>26</sup>Tunu nu'hua enu rri'i elliebacu' nú neli nzequiee inziu' Diose, pero ni'teme' la bi'yalla lunú rnilla, sequienulla le'ca tsia li'illa nu lecaxi zibi' nú rri'illa elliebacu' nú nzequiella inziu' Diose che. <sup>27</sup>Xne para Diose, enu neli nzequie inziu'nu nu la ria'lla ni' tucu nú necha neca, li'illa rri'illa elietsa lubee endu' zaqui, cuna lubee una'a enu unguti niyu' chenu nu' nú seca la'cha' beella, nu ri'yalla li'illa lu beenú necha neca, nú nu' lu iliulabequie!.

**La cañi bee bene xa rri'i  
bee bene lu sa' bene**

**2** Nee, bee sa'a enu nzeli arquia'ahua Jesucristo enu rnibiy'a, la cañihua xa ri'ihua lubee bene. <sup>2</sup>Te zucua'ahua, chenu neyete'sa'hua liñi indu elu riete'sa'hua, nu riña tucu bene xene

enu nutu laquie fiñu luhua nu nu' bi'i oro yaalla, nu che riña tucu bene elitsi enu nutu laquie uxu luhua.<sup>3</sup> Chequie máse ri'i casohua bene xene enu nutu laquie fiñu nu nihua lulla: "Uzucu ca'a elu neca nze'ca." Nu nihua lu bene elitsi ze'e: "Uzucu lu'tsia urre uzucu lu yuu cua!."<sup>4</sup> ¿Xie' la cañihua nú rri'ihua lubee bene chenu rri'ihua scua la? Chenu rri'ihua scua se'tahua bee bene cuna elliebacu'huá nú necha neca.

<sup>5</sup> Uri'ihua beya! bee sa'a enu nzeli arquia'ahua Jesucristo enu chiqui' se'ca. Diose ucañi bee bene elitsi lu iliulabe quie' para nú chiqui' tsu teneli arqui'beella lunu, nu riña beella elu rnibiyu'nú, tucu nú ucuaqui u'namu nū dete'nu lubee bene enu seca li'inu.<sup>6</sup> Nu li'ihua lle'natsia rri'ihua caso bee bene elitsi. ¿Xie' la neca bee bene xene enu máse rri'i nú nehuana secahua nu ruya! beeí li'ihua lubee usticia la?<sup>7</sup> Nu ¿xie' la neca bee bene xene enu máse rni bedichia' nú necha neca equie cuenda! Jesucristo la?, nu equie cuenda' li'inu neca'ahua bene' Diose.

<sup>8</sup> Nee quie tunu li'ihua rri'ihua tucu nū rnibiyu' ley Diose, tucu nū niquie lu ichi' stichia'nu elu rni: "Uzeca bee bene tucu nū secalu li'ilu rri'i nze'calu che."<sup>9</sup> Pero tunu la ri'ihua tucu necatse lubee bene, rri'ihua dula che, xne la zucu'huá tucu nū rni ley' Diose.<sup>10</sup> Xne tatse bene enu sucu' yee nū rni ley' Diose, pero nu' tucu nū la zucu'lla lu cuenda' ley cua!, uri'illa fallo lu yeene che.<sup>11</sup> Le'ca li'i Diose enu uni: "La lu'cu niyu stucu una'a, nu

la lu'cu una'a stucu niyu", le'ca uninu: "La úti bee bene sa' bene." Nu tunu la lu'cu niyu stucu una'a nu la lu'cu una'a stucu niyu, pero ruutilla bee bene, scua la zucu'lla lunú rni ley.<sup>12</sup> Enze'e uni'huá nu uri'ihua xi neca bee bene enu neli dete' cuenda lu Diose, tucu nū rni stichia'nu nū sila'a lia'ahua lu dula.<sup>13</sup> Xne bee bene enu la hua'a arqui' bee sa', le'ca lahu'a arqui' Diose li'ibeella chenu hualunue lu cuenda' bee bene, pero bee bene enu rua'a arqui' sa' lecaxi lliquilla chenu riña bichia ze'e.

### Rqui'ña nū ri'i bee bene tucu nū nzeli arqui'lla Diose

<sup>14</sup> Bee sa'a enu nzeli arquia'ahua Jesucristo enu chiqui' se'ca, nee nia luhua lecaxi zibi' tunu rni tucu bene nū nzeli arqui'lla Diose nu la ri'illa tucu nū rrinu, ¿xie' nu' modo tsila'alla equie nū rnilla nū nzeli arqui'lla scua la?<sup>15</sup> Te zucu'ahua tunu nu' taa tucu'ahua sia niyu uree sia una'a rri'i falta xuculla, ure beenú aculla tucu bichia.

<sup>16</sup> Chequie ni tucuhua lubeella: "Uquia nze'cahuá nu la tsí'hua nū nucuaa nu la lia'na'huá", pero tunu la dete'huá nū secal'a'cha' beella; ¿lecaxi zibi' nū unihuá scua lubeella che?<sup>17</sup> Le'ca esquie tunu rni tucu bene nū nzeli arqui'lla Diose nu la ri'illa tucu nū rrinu, lecaxi zibi' nū rnilla nū nzeli arqui'lla Diose che.

<sup>18</sup> Hasta nu' bene enu ni: "Li'ilu rniliu nū nzeli arqui'lu Diose, nu li'á rri'á tucu nu niarqui'nu." Nee ulube' tucu nū nzeli arqui'lu Diose sin nū ri'ilu tucu nū rrinu, che lubea tucu nū nzeli arquia li'inu xne rri'a tucu

nú rrinu. <sup>19</sup>Rri'i nze'calu nú nzeli arqui'lu nú nu' tucutsia Diose. Pero hasta bee beze'lu nzeli arqui' nú nu' tucutsia Diose nu hasta recatse'tse' beezi xiqui beezi. <sup>20</sup>Enze'e la aca netundulu, uri'i beya' tunu nzeli arqui' bene Diose nu la ri'illa tucu nú niarqui'nu, lecaxi zibi' nú nzeli arqui'lla scua che. <sup>21</sup>Benea'ahua enu udetela tuxie Abraham, uri'i Diose nú necalla xi neca tucu bene enu la lu'cu dula, xne uzucu'lla nú rni Diose chenu uninu lulla nú nze utilla endu'lla Isaac para dete'lla li'i xi neca tucu u'na lunu. <sup>22</sup>Ulañi'hua nee, equie nú uyali arqui' Abraham Diose, nu equie nú uri'illa tucu nú niarqui'nu, scua unga acee nú diquinu' arqui'lla uyalí arqui'lla li'inu. <sup>23</sup>Scua uyalu tucu nú nique lu ichi' Stichia' Diose elu rni: "Uchili arqui' Abraham Diose, enze'e uyucu arqui' Diose li'illa xi neca tucu bene enu né ri'i dula." Nu scua uyulu bee bene li'illa nu necalla xi neca tucu enu rquiete' Diose. <sup>24</sup>Ulañi'hua nee, nú rri'i Diose nú neca bee bene xi neca tucu bene enu la lu'cu dula equie nú rri'i bene tucu nú niarqui'nu, nu lacane equie nú nzelitsia arqui'lla li'inu. <sup>25</sup>Tucu nú unga lu una'a huexe enu lee Rahab uri'i Diose nú necanchu xi neca tucu bene enu la lu'cu dula, xne uri'inchu tucu nú niarqui'nu chenu udete'nchu ni'nchu ucachi'lu chiucu bene Israel enu uyatsilña lachinchu, nu uri'inchu elietsa lubeella nú ubenchila' beella stucu inzui rene. <sup>26</sup>Xne xi neca tucu bene enu la lu'cu espíritu la nehuañilla, le'ca scua necane tunu nzelitsia arqui'

bene Diose, nu la ri'illa tucu nú niarqui'nu lecaxi zibi' nú rni bene nú nzeli arqui'lla li'inu che.

### **Lu cuenda' nú xa rri'i lu'chi bene**

**3** Bee sa'a enu nzeli arquia'ahua Jesucristo, le'ca nia luhua nú la aca huaxihua enu niarqui' nú aca bee ulaxcuela enu zete' Stichia' Diose lubee bene, xne rri'ihua beya' nú lia'ahua enu sete'ahua Stichia' Diose lubee bene másela juerte chiu'lue lu cuenda'ahua tunu la ria'ahua tucu nú rialane. <sup>2</sup>Ye'ahua nu' chenu rri'i dula ana lua'ahua, neequie tunu nu' enu lá ni níl tucu bedichia' nú necha neca li'illa necalla tucu bene enu chiqui' neca nze'ca lu Diose, nu le'ca recalla rnibiyal'lla lulla. <sup>3</sup>Li'ihua nediyal'hua nú chenu rdu'ahua freno ru'u bee huayu para nú zucu' beeí lunú niarquia'ahua, scua aca'ahua nibiya'ahua lubeef. <sup>4</sup>Le'ca esquie necane lu cuenda' bee barco, añinzuka nú llenee nu añinzuka nú juerte si'ña bii, pero cuna tucu icu' me' nú nzucu rqui' barco, icu' quie' lee timón, cuna icu' quie' senu bene barco catse elu niarqui'lla. <sup>5</sup>Le'ca scua neca lu cuenda' lu'chi bene, me'tsiae pero hasta bee bedichia' nú máse necha neca xiu'u ru'u bene. Lu'chi bene neca xi neca tucu xila me', pero cuna tucu xila me'tsia nú'modo quiee quii diqui neca tucu dañi. <sup>6</sup>Lu'chi bene neca xi neca tucu quii, necane xi neca tucu elu nu' bee nú necha neca, nu tunu la bi'ya'ahua lu'chia'ahua rnitilue lia'ahua, che diqui lunú nehuañia'ahua chiu'u bee bedichia' nú necha neca rua'ahua nú nze'ta ebila.

<sup>7</sup>Lia'ahua nediy'a'ahua nú ye clasia' bee nañi xi neca bee iñi, bee serpiente, cuna bee nañi enu nu' lu inzatu' nu' modo reca maxu beeí, nu rri'i maxula bene iliulabe beeí.  
<sup>8</sup>Pero lecati aca ri'lí maxu lu'chi. Lu'chi bene neca xi neca tucu nú leca modo aca maxu, necane xi neca tucu nú chee nu' veneno nú ruuti bene. <sup>9</sup>Cuna lu'chialahua rnialahua bedichia' nze'ca lu Diose Pa liñibe, nu le'ca li'i rnialahua bedichia' chi'qui' lu sa'ahua enu ureche' Diose tucu nú rnanu. <sup>10</sup>Nu ru'ahua xiu'u bedichia' nze'ca cuna bee bedichia' chi'qui', bee sa'a enu nzeli arquia'ahua Jesucristo, la yala nú ria'ahua scua. <sup>11</sup>Lil'ihua nediy'a'ahua nú elu rliñi inza, leca modo nú liñi inza nze'ca cuna inza nú neribi. <sup>12</sup>Le'ca scua la ayu aceituna lu aca higuera, nu la ayu higo lu aca uva, nu le'ca la liñi inza nze'ca elu rliñi inza nú neribi.

### Elliebacu' nú neli neca nze'ta lu Diose

<sup>13</sup>Tunu nu' taticuhua enu si' nú reca nu rri'i beya' ye nú neca Stichia' Diose, rqui'ña nú aca lle'na arquia'lla tucu nu rialane, scua lube'lla lunú reca elliebacu'lla.  
<sup>14</sup>Pero tunu chiqui' ria arquia'hua lubee sa'hua nu ye nú niarqui'hua para li'itsiahua, lecaxi zibi' nú nellianhua nú recahua Stichia' Diose, sino que sequienuhua bee bene che. <sup>15</sup>Nu bee clasia' bee elliebacu' cua' la ye'ta bee nucua' lu Diose, nze'tatsia bee nucua' lubee bene iliulabe quie', cuna lu bezel'u.  
<sup>16</sup>Xne elu nu' beenú ria arqui' bee bene lusa' bene cuna nú niarqui'tsia

bee bene stene'lla para li'itsialla, ze'e nu' xuu cuna ye beenú necha neca. <sup>17</sup>Pero bee bene enu reca elliebacu' nú nze'ta lu Diose, rluti rcua'nalla nú huañi nze'calla lu Diose, cuna nú nzuxi arqui'lla lubee bene, cuna nú ñia nzuquie arqui'lla bee bene, nu rua'a arqui'lla bee bene, nu rri'illa nú neca nze'ca lu ye bee bene, nu ri'illa tucu necatse lu ye bee bene. Nu le'ca sa'alulla lunú rrnilla. <sup>18</sup>Bee bene enu rcua'na nú la liu bee bene rcua'na beella nú huañi nze'ca beella cuna bee bene, scua nehuañi beella tucu nú niarqui' Diose nú huañi beella.

### Rqui'ña nú aca lle'na arquia'hua lu Diose

**4** ¿Cá nze'ta nú rlehua lubee sa'hua cuna nú rliuhua? ¿Xie' la ye'ta nucua' lu elliebacu' nú necha neca rri'iuhua? <sup>2</sup>Lil'ihua rle'hua nú lu'cuhua lunú la lu'cuhua, nu hasta ruuti sa'hua para nú lu'cuhua lunú niarqui'hua, le'ca rria arquia'hua lubee sa'hua, nu tunu la lu'cuhua lunú rlu'cu bee sa'hua, chequie rquixie nú rlehua lubee sa'hua, cuna nú rliuhua, pero neli nú la lu'cuhua lunú niarqui'hua, xne la nacu'huane lu Diose. <sup>3</sup>Nu tunu rnacu'hua lunú niarqui'hua lu Diose, la yucuhuane xne la nacu'huane lunu tucu nú neca nze'ca, rnacu' tsiahuane lunu para nú huañitsiahua tucu nú neca elliebacu'hua nú necha neca. <sup>4</sup>Lil'ihua la aca neli nú secahua Diose. ¿Xie' la ri'líhua beya' nú tunu nzequiehua lunú necha neca nu' lu iliulabe quie', sucu' ru'uhua

lu Diose la? Enze'e enu niarqui' nú chequie beenú necha neca nu' lu iliulabe quie', che le'ca li'illa rri'illa nú sucu' ru'ulla lu Diose. <sup>5</sup>Xne la lianitsia lu ichi' Stichia' Diose elu rni: "Espíritu Santo nú udu' Diose arquia'ahua, chiqui' niarqui'nu nú zeca'ahua Diose." <sup>6</sup>Nu chiqui' huaxi seca elietsa nú rliqui' Diose lua'ahua, tucu nú nequie lu ichi' stichia'nu elu rni: "Diose rri'i elietsa lubee bene enu lle'na arqui' lunu." Pero la ri'i casonu bee bene enu nelliña. <sup>7</sup>Enze'e uzu'cu'hua Stichia' Diose. Utsuta' arqui'hua para nú la ri'i beze'lu ana luhua, nu scua tsana' arqui'i li'ihua. <sup>8</sup>Uquiabicahua lu Pa'ahua Diose, nu che ri'i casonu li'ihua. Utsana' arqui'hua stulahua, li'ihua bee bene enu rlu'cu dula, li'ihua enu sa' arqui' nú nzequie inziu' Diose, diquinu' arqui'hua uquia quiehua inziu'nu. <sup>9</sup>Uquianu arqui'hua nu utsu nehuana arqui'hua, nu una'hua equie cuenda' stulahua. Luhuare nú xi'chihua una'hua, nu luhuare nú ñia nzu arqui'hua utsu nehuana arqui'hua. <sup>10</sup>Aca lle'na arqui'hua lu Pa'ahua Diose, nu li'inu zucu' ayanu li'ihua.

### La qui'ña nú ze'tahua bee sa'hua

<sup>11</sup>Bee sa'a enu nzeli arquia'ahua Jesucristo, la ze'tahua bee sa'hua, xne bee bene enu se'ta bee sa' nu rlualulla lu cuenda' bee sa'lla, li'illa se'talla bee sa'lla cuna nú rlualulla lunú neca ley' Diose. Nu tunu li'ihua rlualuhua nú neca ley' Diose, li'ihua rnibiy'a'hua lu ley cua', luhuare nú zucu'hua lunú rnii. <sup>12</sup>Tucutsia Diose udu' ley nu li'inu necanu enu rlu'cu nú rnibiy'a'

para nú tsila'anu bee bene, cuna nú dete'nu castiya bee bene. Pero li'ilu, éti necalu nú rlualulu lu cuenda' bee sa'lú?

### La uti'lliña bene lunú ri'illa ye'e

<sup>13</sup>Nee uquie'e diacahua li'ihua bee enu rni: "Nee urre ye'e cha'ahua tucu ciudad urre stucu ciudad, nu ze'e llua'ahua tucu lana nu ria'ahua bee berexe, cuna nú ria'ahua ana huaxi dimi", <sup>14</sup>nu ni' teme' la ri'ihua beya' xi nzu aca ye'e. Xne elunehuañi nú rlu'cua'ahua neca xi neca gú, nú nu'e terratu nu sterratutsia rnitilue. <sup>15</sup>Lunú riala nihua: "Tunu liqui' Diose nú nehuañia'ahua ri'ahua ningue' urre ri'ahua ningue'." <sup>16</sup>Pero li'ihua máse nzequiehua stichia'hua nú nelliña, nu ye bee clasia' bee elulliña cua' necha neca. <sup>17</sup>Enze'e bene enu nediyá' nú xi riala ri'illa nu la ri'illae, rri'illa dula che.

### Equie nú xa zeca bee bene xene

**5** Nee, iuquie'e diacahua li'ihua bee bene xene! <sup>1</sup>Una'hua nu ubixialihu equie nú nehuana zecahua nu cuna nú tsil'hua! <sup>2</sup>Bee eluxene'hua rlaxulane, nu bee xucuhua racula bee belala!. <sup>3</sup>Bee oro cuna bee plata nú rlu'cuhua ruchila bee. Ye bee nucua' rlube' lunú necha rri'ihua, nu le'ca li'ibeet nucua' la'xue li'ihua tucu nú rri'i quii. Lecaxi zibi' nú uduche' tsiahua eluxene cua' para bichia chenu hualu Diose lu cuenda' bee bene. <sup>4</sup>Ubi'yacuruhua, bee moso' enu uri'i riña'hua, rnacu' beella luhua nú ixiuhua beella, nu hasta Diose enu rlu'cu ye nú rnibiy'a' ubene'la'

lunú xanabitsi beella. <sup>5</sup>Li'ihua  
nehuañihua lu iliulabe quie' tucu  
nú niarqui'tsiahua nu rri'ihua tucu  
nú riu' arqui'hua, pero rri'itsiahua  
nú rru'cu nucua' arqui'hua lunú  
lecaxi zibi' para bichia nú hualu  
Diode lu cuenda' bee bene. <sup>6</sup>Nu  
hasta ucua'nahua xa modo unguti  
bee bene enu lecaxi urí'i sin nú  
azucu' ru'u beella luhua chenu  
unguti beella.

**Rqui'ña nú lu'cu bee bene paciencia  
chenu rnacu' beella lu Diode**

<sup>7</sup>Nee, bee sa'a enu nzeli  
arquia'ahua Jesucristo, ulu'cuhua  
paciencia hasta bichia chenu riña  
Jesucristo enu rnibiyá' lua'ahua.  
Tucu nú rlu'cu bene enu rri'i riña' lu  
yuu paciencia desde chenu rquixie  
rlaca quiu nu hasta nú rdete ru'u  
quiu para nú riuculla ula'cu'lla.  
<sup>8</sup>Le'ca scua li'ihua ulu'cuhua  
paciencia nu la llaca'ahua, xne la  
lea' nú nze'ta zeca Jesucristo enu  
rnibiyá' lua'ahua.

<sup>9</sup>Le'ca nia luhua nú la xana  
bitsia'ahua lu cuenda' bee sa'ahua  
para nú la yalahua ni' tucu castiya,  
xne axula nzu nú riña li'inu  
enu hualue lu cuenda' bee bene.  
<sup>10</sup>Uquia quiehua tucu nú uri'i bee  
profeta enu udixiule'e tucu nú  
uni Diode lubeella, ulu'cu beella  
paciencia nu uriqui' beella lunú  
nehuana ulle'ca beella. <sup>11</sup>Li'ihua  
nediya'ahua nú ñia nza lu cuenda'  
bee bene enu rriqui' lunú nehuana  
seca. Ubene'la'ahua xa uriqui' Job  
lunú nehuana ulle'calla, nu le'ca  
nediya'ahua xa uri'i Diode lulla  
chenu ulaxu nú ulle'calla scua, xne

rua'a arqui' Diode bee bene cuna nú  
rlu'cu arqui'nu bee bene.

<sup>12</sup>Pero ubi'yahua chenu  
rdichia'huaurre chenu rri'ihua tucu  
compromiso cuna bee bene, la yala  
nú quie'ehua Diode, ure stucu nú  
rene para nú la zecahua castiya'hua,  
mejora uni'hua nú esquie necane  
tunu esquie necane, nu uni'hua nú  
la acane esquie tunu lacane esquie.

<sup>13</sup>Tunu nú'hua enu nehuana seca,  
rqui'ña nú nacu'lla lu Diode para  
nú ri'nu elietsa lulla. Nu tunu ñia  
nzu arqui' tatse tucuhua ula nze'e  
canto lu Diode. <sup>14</sup>Nu tunu nú'hua  
enu riti, bixia nze'e bee sa'ahua  
enu rnibiyá' leta bee sa'ahua enu  
nzeli arquia'ahua Jesucristo, para  
nú nacu' beella lu Diode equie  
cuenda' bene ze'e nu du' beella  
aceite equie bene ze'e lunú lee  
Jesucristo. <sup>15</sup>Chenu rnacu' beella  
lu Diode equie cuenda' bene enu  
riti ze'e nu nzu teneli arqui'beella  
lunu, che yeca' bene enu riti ze'e,  
nu ri'iyeca Diode li'illa, nu tunu nu'  
dula nú uri'illa ri'i Diode perdona  
li'illa. <sup>16</sup>Enze'e utsiru'uhua bee  
dula nú uri'ihua lubee sa'ahua, nu  
una'cu'ahua lu Diode lu cuenda' bee  
sa'ahua para nú yeca'ahua. Xne bene  
enu neca nze'ca arqui' lu Diode  
chenu rnacu'lla lunu, rri'nu caso  
li'illa. <sup>17</sup>Tucu nú ulle'ca profeta  
Elías ungalla tucu bene tucu nú  
neca'ahua, chenu uziqiuella nu  
unacu'lla lu Diode nú la laca quiu,  
che né laca quiu chuna lana arula'.  
<sup>18</sup>Nu chenu unacu' zecalla lu  
Diode nú laca quiu, che uquixie nú  
ulaca quiu nu unguyu' zeca beenú  
unguyu' luyuu.

<sup>19</sup>Bee sa'a enu nzeli arquia'ahua Jesucristo, tunu nu' ta tucuhua enu xiu'uchu inziu' Diose, nu stucuhua ri'i nú benchila' zecalla inziu' Diose.  
<sup>20</sup>Uri'ihua beya' nú tatse tucuhua

enu rri'i nú benchila' zeca tucuhua inziu' Diose para nú la chequia'lla inziu nú necha neca, utsila'alla nze'e lu castiya' nze'e nu uri'illa nú unga perdona huaxi stula nze'e che.